

Date – 02/09/2024

Time - 18:30 -18:40Hrs

## REGIONAL NEWS BULLETIN

### HEADLINES (EVENING)

1. Fur ruahtui tla tam lutuk avanga harsatna tawk nasa tak, Mamit District ah inkalpawhna kawng ping te haifai a ni nual tawh a, ei leh bara harsatna tawk an la awm lo tih sorkar thuchhuah chuan a sawi.
2. Mizoram sorkar chuan ruah tui hi la tla belh zel thei a nih avangin hemi in a nghawng theih lakah mipuite fimkhur turin a chah.
3. Union Cabinet chuan cheng vaibelchhe 2817 senna tur Digital Agriculture Mission a pawm.
4. Telangana-a ruahsur nasa vanga chhiatna thlengah mi 16 an thi.

<><><>

### DISASTER

Fur ruahtui tla tam lutuk avanga harsatna tawk nasa tak, Mamit District ah inkalpawhna kawng ping te haifai a ni nual tawh a, ei leh bara harsatna tawk an la awm lo bawk a ni.

Vawiin khan Mamit DC Conference Hall-ah tunhnaia fur ruahtui nasa tak avanga Mamit District chhunga chhiatna hrang hrang thlir hovin District Disaster Management Committee Chairman Pu Jacob Lalawmpuia District Bawrhsap ni bawk hovin an thutkhawm a. He huna tarlan anih dan chuan, PWD Highway Mamit Division huamchhungah kawng min 24 awmin, heng zinga 21 chu thenfai a, tih tlang a ni tawh a, kawng tih tlang tawhah hian ruahsur a nasat chuan min leh mai thei dinhmuna awm a awm nual a ni.

Tuidai bul min chu engtikah nge a tlang ang tih sawi theih mai a ni rih lo a, Mausein kawng hui lam zawh theihin awm tawh mahse kawng enkawl lohna rei tawh a nih avangin lirthei lian chi tana tlan harsa lai ala awm a, hemi kawng thawmthata chei thatna tur pawh thuneitute hnenah thlen mek a nih thu tarlan a ni.

PWD Mamit Division huamchhungah khawchhung kawng min neuh neuhte thenfai nual a ni tawh a, Mamit atanga Phaizau panna kawng pawh tunkar chhunga sial tlang theih beisei a ni a. Mamit leh Bairabi kawng pawh leimin avang hian kaltlang theih ala nilo a ni.

PHED Department tarlan danin Phaizau atanga Mamit tuilakna kawng leimin avang hian a chhe vek a, tunah hian theihtawpa hnathawh a ni chungin kar 2 chhung vel tui lak luh theih a ni dawn lo a,

Power & Electricity Department, Mamit Division huamchinah pawh leimin avanga electric ban tlu leh awn a tam hle a, Bairabi leh W.Phaileng Mamit kaltlanga eng lakluhna Tower pakhat a bul leimin avangin dinhmun hlauhawmah awm mekin a dang dinhmun erawh kawng tlang loh avanga la chian loh a awm bawk ni.

Buhfai dinhmun erawh a hlauhthawnawm lutuk lova, kawng kal harsa zual Godown pariatah Oct leh Nov thla thleng stock a awm a, Godown pali

Mamit, W. Phaileng, Phuldungsei, Pukzing te erawh an thla mamawh dan a zira pek thin an ni. Oil lamah thlaphanna tur erawh a awm rihlo a thudawn a ni a, LPG trip rawn kal mek a awm thu dawn a ni bawk.

District Hospital-ah tunhnai khuarel chhiatna an tawrh avanga hliam emaw harsatna tawk an awm report dawn a nilo a, chhiatna thlen thulha inbuatsaihna erawh kalpui a nih thu tarlan a ni bawk.

Pu Jacob Lalawmpuia chuan tunhnaiah ruah nasa tak avangin harsatna hmun hrang hrangah an tawk a, district ang zawng pawhin a tuar nasa ber an ni a a hriat thu a sawi a, mipui nunphung ti khaihthlak thei inkalpawhna kawng ping, eng leh tuih te an tuar nasa hle a ti.

Meeting-ah hian W.Phaileng BDO, Reiek BDO leh Kawrtethawveng BDO atangin an huam chhunga chhiatna leh harsatna an tawhte ngaihthlak a ni a, Mamit khawpui chhunga Village council paruk atangin an vengchung dinhmun hrang hrang ngaihthlak a ni bawk.

Hetihlai hian Mizoram sorkar chuan ruah tui hi la tla belh zel thei a nih avangin hemi in a nghawng theih lakah mipuite fimkhur turin a chah.

Sorkar thuchhuah tarlan dan chuan, kumin hian fur ruahtui a tlak tam avangin Mizoram hmun hrang hrangah chhiatna thleng a tam hle a. Leimin avanga mithi leh in leh lo chan mi engemawzat an awm a. Hmun hrang hrangah leimin avangin inkalpawhna lamah pawh harsatna tam tak a thleng bawk. Heng chhiatna thleng te hi sorkar chuan pawh a tiin a tuartute pawh a tawrhpu takzet a, mipuite harsatna su kiang tur hian theihtawpin hma a la mek reng a ni, a ti.

Khaw chin thlirtu - India Meteorological Department (IMD) chuan ruah hi la sur chhinzawm zel turin a tarlang a. Mizoram leilungte a hnip tawh avang leh chhiatna thleng that thei hmun hrang hrangah a awm avangin mipuite fimkhur theuh turin an ngen nawn leh a. Mahni in leh a vel a tui kal dan te ennawnin, leimin thei hlauhawm leh chhiatna lian tham thlen thei awm a awm chuan thuneitute hnenah a rang lama hriattir zel turin mipuite an ngenin an hriattir bawk a ni. Ruahsur nasa avanga kawng hrang hranga harsatna awm theiah, sorkar department hrang hrangte mahni mawhphurhna theuh hlen tura theihtawp chhuah turin an ngen nawn leh bawk a ni.

<><><>

MPCC PRESS CONF

Mizoram Pradesh Congress Committee senior Vice President Pu Lalnunmawia Chuango chuan CBI hnena hnuchhui phalna pek chungchanga rawtna leh ngenna leh ZPM Sawrkarin Mizoram Lokayukta Act, 2014 a tih danglam chungchanga rawtna leh ngenna, 4 Chief Minister hnena an peke chu thla hnih dawn a ral hnuah pawh a chhanna an la hmu lo a ti.

Vawiina khan Aizawl press Club ah hr thu hi sawiin Pu Lalnunmawia chuan an rawtna leh ngenna te tih hlawhtlin tuma hmalakna an neih pawh hriat tur a awm lo a ti a ni.

Chief Minister in CBI hnena General Consent pek chungchanga kum 2023 December ni 14-a Assembly Sessiona a sawi CBI chu general consent an pe dawn a. Engmah phalna dil a ngai dawn lo. An kuta thu lut chu an chu mai dawn a ni, a tih dungzuia CBI hnena General Consent, December 28 a an pek chu sut leh in kumin July 1, khan Consent thar an pe a. Chu consent tharah chuan Mizoram sawrkar hnuiaia thawk, Chief Minister, Minister leh sawrkar hnathawk dangte CBI in a chhui theihna chu hnuk let in, a mal mal a State

sawrkar phalna ziaka lak phawt tur tiin sawrkar hmasa hun lai ami ah chiah an kir leh ta a ni a ti.

Hemi chungchangah hian Chief Minister hian a hma ami nen a danglam lo, General Consent tho a ni" tiin tang thin mahse, a tanna chu a dik lo a ni tih phat rual a nih loh avangin Assembly Session August 21khan a rawn puang ta a ti a, hemi tum hian, Chief Minister chuan CBI hnena an pek chu a hmingah chuan general consent a la ni reng a, amaherawh chu State employee a huap ta lo a, Chu chu an nin huap rawh se an ti thei lova. Tu pawh lo sawrkar se kha bak kha an pe thei lo" tiin a sawi a. Thu dik erawh chu State sawrkar hnuaia hnathawkte huap tura CBI hnena general consent pek hi Delhi Special Police Establishment Act, 1946 section 6 hnuaiah State sawrkar thuneihna liau liau a ni a ti.

Code of Criminal Procedure, 1973 thlaktu dan thar Bharatiya Nagrik Suraksha Sanhita, 2023 emaw, Indian Penal Code, 1860 thlaktu dan thar Bharatiya Nyaya Sanhita, 2023 hnuaiah emaw, eng dan dang hnuaiah mah khapna engmah a awm lo tih sawiin Chief Minister hian thu dik lo hmangin mipuite rilru hruai kawi tum tawh lo se a ti a ni.

Pu Lalnunmawia chuan, ZPM sawrkar chuan CBI hnena general consent pek an ngam ta lo an nih pawhin, Mizoram Lokayukta in State sawrkar phalna la kher lova tul a tih hun huna CBI a hman theih nan Consent pe turin an ngen tih a sawi a, an in tiam anga corruption laka fihlim an tum tak tak a nih chuan hlauh tur a awm lo tih an hriattir duh tih a sawi a, Lok Ayukta thuam chak tura hmala turin an duh tih a sawi bawk a ni.

<><><>

POSHAN MAAH

Directorate of Women & Child Development buatsaih Rastriya POSHAN Maah 2024 chu vawiin khan Women & Child Development Office, Tuikhuahtlang ah hawn a ni a,

Hawna inkhawm hmanpuitu, Social Welfare, Tribal Affairs, Women & Child Development Department Pi Lalzarmawii chuan Rastriya POSHAN Maah 2024 kalpui tur chu ram hriselna atana hmasawna rahbi pawimawh tak a nih ngei a beisei thu leh hriselna, hmasawna leh changkanna chu department kutah thui tak a inngah thu a sawi. Thawktute chu mipui tana programme siamte zirchianga a hlawhtlin nana theihtawp chhuah turin a chah a ni.

Women & Child Development Director Pi Zoramthangi Chhangte chuan. Kumin atana thupui thlan 'Overall Nutrition' hnuaiah hmalak dan tur theme hrang hrang duan pangnga a sawi a, chungte chu - Anaemia (Thisen tlakchhamna beih kawnga test runpui), Growth Monitoring (Thandan endik runpui), Complementary Feeding (Nau chaw hrai dan chungchang), Poshan Bhi Padhai Bhi (Chaw tha pe la zirtir tha bawk rawh) tih leh Technology for Better Governance, Transparency and Efficient Service Delivery te a ni a, department hmalakna chu mipui nun khawih thil, an tana malsawmna, damna leh himna a nih avangin thawktute chu an hmazawna tihtur theuhte theihtawp chhuaha tha taka hlen chhuah tum turin a sawm a ni.

POSHAN Maah (Nutrition Month) hi Sawrkar laipui Ministry of Women & Child Development hnuaia Nutrition Mission lian tak POSHAN Abhiyaan hmalakna zinga programme pawimawh tak pakhat niin, kum tin September thla chhunga hman thin a ni a. Kumin hian a tum 7-na atan Ministry of

**Women & Child Development ruahman angin Poshan Maah 2024 hi hman leh tum a ni.**

<><><>

**PMSSY**

**Saitual Bawrhsap Dr Lalngura Tlau hovin vawiin khan District Level Committee on Centrally Sponsored Scheme Pradhan Mantri Matsya Sampada Yojana (PMSSY) meeting wavi 1-na DC Conference Room ah neih a ni a.**

**He hunah hian PMMSY(CSS) hnuaiia kum 2023-2024 chhunga sangha dil siam tanpuina dil mi 482 atangin mi 25 te Sangha dil siam tanpuina dawng turin District Level Committee te chuan an pawmpui a. Saitual District tan 5 hectare allotment hmuh niin mi 1 zelin 0.2 (2000Sq.m) hectare assistance an dawng thei dawn a ni.**

**Dr Lalngura Tlau chuan central scheme hnuaiiah mipuite hamthatna lo thleng thin chu lawmawm a tih rualin, a nihna ang taka hmang tangkai an tam tawk lo thin chu pawl a tih thu a sawi a. Tun tuma beneficiary thlan chhuahte chu department ten uluk taka monitoring ti tur leh an hmang tangkai tawk em tih vil zui turin a chah a ni.**

**Meeting-ah hian Pi Zomuansangi DFDO , Pi PC Zonuntluangi, PD, DRDO leh Pu Robert Zosangliana, Manager, Lead District Manager, Serchhip bakah Line Department aiawhte, constituency tin aiawh prominent citizen-te an tel a ni.**

<><><>

**UNION CABINET**

**Union Cabinet chuan cheng vaibelchhe 2817 senna tur Digital Agriculture Mission a pawm. Union I&B Minister Ashwini Vaishnaw chuan hemi chungchang hi New Delhi-a chanchinbumite hrilhin loneitute khawsak hmasawna tur leh an sum lakluh ti pung turin Union Cabinet chuan Digital Agriculture Mission hi a pawm a ti a. Digital Public Infrastructure hmalak mekna nena kalkawp tura tih anih thu a sawi.**

**Union Cabinet hian crop science cheng vaibelchhe 3979 senna turte, agriculture education, management leh social science atan cheng vaibelchhe 2291 senna turte a pawm baw a. Ranyulh te hriselna leh an tharchhuah ti tam turin cheng vaibelchhe 1702 hu hmalakna leh Horticulture tihhmasawna tur cheng vaibelchhe 960 senna tur a pawm a. Krishi Vigyan Jendra ti changlung turin cheng vaibelchhe 1202 senna tur a pawm baw.**

**Hei bakah hian Mumbai leh Indore inkalpawhna tur rel kawng km 309-a thui siam nan cheng vaibelchhe 18.036 a pawm baw a. He project hi kum 2028-29 ah zawh hman beisei a ni.**

<><><>

**TELANGANA RAIN HAVOC**

**Telangana-a ruahsur nasa vanga chhiatna thlengah mi 16 an thi. State IT minister D Sridhar Babu chuan state sawrkarin chhawmdawlina hna thawk turin theihtawp a chhuah a, hmun hniam laia awm district-ah te tui a lian nasa a ti a. Khammam, Mahabubabad leh Syrapet district ah te an tuar nasa niin a sawi a ni.**

**Sawrkar chuan chhiatna thlenga thi te chu sawrkarin ralna sum a pek tur thu a puang a ni.**

<><><>

## **RUSSIAN HELICOPTER CRASHED**

**Russian Mi-8 helicopter chesuala chuang mi 22 te ruang hmuhkim a ni tawh. Mi-8T helicopter hi Kamchatka region-a Vachkazhets hmunah kar hmasa inrinni khan a tla a. Kamchatka region minister of emergency Sergei Lebedev chuan ruangte hi hmuhkim a nih hnuah endik turin forensic laboratory lamah thawn a ni tawh a ti a. Ruang zawn hna pawh zawhfel anih thu a sawi.**

**He thlawhna hi Vityaz-Aero airline te enkawl niin a thlawhchhuah hnu reiloteah biak pawh theihlohin a awm zui a. Federal Air Transport Agency sawidanin thlawhna thlawhchhuah hnu lawka dan pangngaia biak pawh an tum chu biak theih lohin an awm nghal a. Thlawhna tlakna hmun nia rinah te hian thlawhna zawn hna ngawrh takin kalpui nghal a ni.**

<><><>